



Lectio Divina

Enero 2021



Ika-3 nin Enero, 2021

Ebanghelyo para Inot na Domingo
kan Taon

MATEO 2:1-12

¹Pagkatapos mamundag si Jesus sa Belen sa Judea, kan mga aldaw ni Hadeng Herodes, may mga mago hali sa sirangan na nagduman sa Jerusalem, ²na an sabi: "Hain si namundag na hade kan Judeo?, ta nahiling mi an Saiyang bituon sa sirangan asin nagdigdi kami sa pagsamba Saiya". ³Pagkadangog kaini, napurisaw si Hading Herodes, asin man an bilog na Jerusalem kaiba nya; ⁴kaya, tinipon an gabos na puon na padi saka mga eskriba kan banwaan, inusisa nya sainda kun saen si Kristo namundag. ⁵nagsabi sinda saiya: "Sa Belen sa Judea. Ta siring an nasusurat sa Propeta: ⁶Asin ika, Belen, daga nin Juda, Bako ka an pinakasadit sa mga darakulang syudad nin Juda; ta hali saimo maluwas an lider, na mapastor kan banwaan kong Israel." ⁷Dangan si Herodes, hilom na inapod si mga mago, inisi sainda kun kasuarin nagpahiling si bituon; ⁸asin, sa pagduman nya sainda sa Belen, nagsabi: "Lakaw, maigot kamong maghapot dapit sa sadit na aki; asin, pagmakua na nindo, paaramon nindo ako, tanganing makaduman man asin makasamba saiya". ⁹Pagkadangog sa hadi, sinda naghali. Uya, an bituon na nahiling ninda sa sirangan, nanginginutan sainda, sagkod na makapag-untok sa ibabaw kan namumugtakan kan sadit na aki. ¹⁰Pagkahiling kan bituon, naugma sindang maray. ¹¹Paglaog sa harung, nahiling ninda an sadit na aki kaiba si Maria na saiyang ina. Nagluhod sinda asin nagsamba Saiya; binuksan an saindang mga kaban, nagdulot saiya nin mga regalo: bulawan, insenso asin mira. ¹²Pinatanidan sa pangaturogan na dai magbalik ki Herodes, nagpuli sinda sa saindang rona sa ibang dalan.

Giya sa paghurop-huop asin paghiras

"may mga mago hali sa sirangan nagtungang sa Jerusalem..."

Mago o hadi? Tulo o nagkapira? Mayong malinaw na kasimbagan sa mga hapot na ini. An sigurado, sinda mga hentil o mga pagano. Harayo an saindang pinaghalian. Sinda nagsakripisyong dakula, tanganing magsamba sa Dyos, na namundag sa Belen. Kun an umboy sarong totoong hadi, sa Jerusalem sya dapat nindang hanapon. Alagad an bituon kan Dyos nagtukdo sainda sa ibang lugar.

Anong dakulang sakripisyo an kaya kong idulot ki Jesus ngunyan na taon?

"Napurisaw si Hading Herodes, asin man an bilog na Jerusalem kaiba nya."

Tano ta mapurisaw an sarong hadi? Kun aram nyang bako man talaga syang tunay na hadi, asin nasungkit nya an pwesto sa maraot na paagi, talagang dapat syang mapurisaw. Ini an dahilan kun tano ipinagadan ni Herodes dawa myembro kan saiyang pamilya. Kaiba nyang napurisaw an saiyang mga suportadores asin an Sanhedrin na ngapit iyo an mapagadan ki Jesus.

Ano an mga nakakapurisaw sako ngunyan na taon?

"Nagluhod sinda asin nagsamba Saiya; binuksan an saindang mga kaban, nagdulot saiya nin mga regalo..."

An pagluhod pagpahiling na an umboy urog pa sainda. Sya sarong tunay na hadi. Asin an pagtaong regalo pagpahiling man giraray kan pagkahadi ni Jesus. An mga regalo igwang praktikal na pakinabang. Enot, madali sindang bitbiton. Ikaduwa, halangkaw an saindang halaga. Dakulang tabang ini sa pagsustenir kan pamilya lalo na kan sinda naglakbay pasiring sa Ehipto. Asin an mga regalong ini tanda man kan misyon ni Jesus. Bulawan huli ta sya hadi. Insenso huli ta sya padi. Mira huli ta sya propetang ipapagadan. An mira lana na linalahid sa sarong bangkay.

Ano an bitbit kong regalo sa umboy na si Jesus?

Ika-10 nin Enero, 2021

Ebanghelyo para sa Ikaduwang Domingo
kan Taon

JUAN 1:35 - 42

³⁵Sunod na aldaw, nakatindog giraray si Juan, asin duwa kan saiyang mga disipulos. ³⁶Hiniling na gayo si Jesus na naglalakaw, sya nagsabi: "Uya, an kordero nin Dyos!". ³⁷Nadangog sya kan mga disipulos pagtataram kaini, asin sinunod ninda si Jesus. ³⁸Si Jesus, pagsalingoy asin pagkahiling sainda na nagsusunod, nagsabi sainda: "¿Ano an hinahanap nindo?". Nagsabi sinda: "Rabbi (na an boot sabihon Maestro), "sain ka nag-eerok?". ³⁹Nagsabi sainda: Madya, asin mahihiling nindo". Kaya nagduman sinda asin nahiling kun sain sya nagpipirmi, asin sa saiya sinda nakidagos kan aldaw na idto; an oras mga alas kwatro nin hapon. ⁴⁰Si Andres na tugang ni Simon Pedro, saro sa duwa na nakadangog ki Juan asin nagsunod saiya. ⁴¹Nahanap nguna nya ining tugang nyang si Simon, asin sinabihan: "Nakua mi an Mesias", na an boot sabihon, Kristo; ⁴²asin dinara nya ki Jesus. Hiniling syang gayo ni Jesus asin sinabihan: "Ika si Simon na aki ni Juan; aapodon kang Cefas', na an boot sabihon Pedro.

Giya sa paghurop-hurop asin paghiras

"Uya! An kordero kan Dyos!"

Padagos si Juan sa pagsaksi dapit ki Jesus. Ngunyan, kaulay nya an saiyang duwang disipulo. Huli kan saiyang pagsaksi, sya binayaan tulos kan saiyang mga disipulo tanganing magsunod ki Jesus. Dai nya itinago si Jesus dawa aram nyang mawawàran syang mga parasunod. Urog mahalaga si Jesus kisa saiya. Ini man an satong misyon. An nobena dapat magdara sato sa Eukaristiya. An predikador dapat magdara kan mga paradangog sa Kagurangnan.

Ano an gigibuhon ko tanganing an Prayer Meeting mag-andam sako sa Santa Misa?

"Sain ka nag-eerok?"

Sa orihinal na Griyegong tataramon, an gamit *meno* para sa erok. An *meno* bakong gayo an istaran. Kun estudyante an naghahapot sa Rabbi, an buot sabihon kaini, 'sain an klasrum kun sain ka nagtutukdo?' ta buot kong mag-adal saimo. Alagad bako ini an buot sabihon kundi, 'sain ka nakatindog?' o 'ano an paninindugan mo?' o 'sisay ka baga?'

Aram ko daw an paninindugan ni Jesus dapit sa mga isyung pangbanwaan?

"Nakua mi an Mesias!"

Bakong gayong bantog si Andres kun ikukumpara ki Pedro. Alagad, makatulong beses ginibo ni Andres an pagdara nin tawo pasiring ki Jesus. Ini an enot. Ikaduwa si aki na may darang sira asin tinapay. Ikatulo si grupong mga Griyego. Ini man an satong katungdan. An pagdara kan satong pamilya, katrabaho asin mga katuod sa Kagurangnan.

Sisay pa an dai ko nadadara sa Kagurangnan? Ano an plano ko para saiya ngunyan na 2021?

Ika-17 nin Enero, 2021

Ebanghelyo para sa Ikatulong Domingo

kan Taon

Mateo 18: 1-5,10

Kan oras na idto nagdulok ki Jesus an mga disipulos sa pagsabi: " Sisay an pinakadakula sa kahadian nin langit?". ² Nag-apod siya saiya nin sadit na aki, pinatindog ini sa tahaw ninda, ³ asin sya nagsabi: "Amen, nagsasabi ako saindo: Kun dai kamo mabirik asin magin siring sa mga sadit na aki, dai kamo

makakalaog sa kahadian nin langit. ⁴ An magpapakasadt nin siring sa sadit na aking ini, iyan an pinakadakula sa kahadean nin langit. ⁵ An mag-ako sa sarong sadit na aki na siring kaini alang-alang sa ngaran ko. Sako nag-aako.

¹⁰ Mag-ingat kamo, na dai nindo hamakon an sarong kaining saradit; ta nagsasabi ako saindo, na an saindang mga anghel sa langit danay na naghihiling sa lalawgon kan Ama kong yaon sa langit."

Giya sa paghurop-hurop asin paghiras

"Sisay an pinakadakula sa kahadian kan langit?"

Sisay matukaw na kataid ni Jesus? Si Pedro na may kapot kan susi? Si Andres na iyo an enot inapod ni Jesus? Si Judas na iyo an tesorero? Sisay sa wala? Sisay sa too? Gusto nindang maaraman kun ano an kriterya ni Jesus tanging sinda makapag-andam. Minsan, iyo man ini an nagdadalagan sa isip ta sa laog kan simbahan. Sisay an malakas sa kura? Pano magin malakas saiya?

Ano an kaya kong itabang sa parokya?

"Kun dai kamo magbirik asin magin siring sa mga sadit na aki, dai kamo makakalaog sa kahadian nin langit."

Ugali palan an hanap ni Jesus, bakong tibay. An magpakumbaba iyo an pinakadakula, siring sa aki. An mani-aki dai nangangahulugan na magin siring sa aking pasaway asin ikol-ikol, kundi naghahagad nin gatas kun gutom, asin ini an tataramon kan Dyos asin an Hawak ni Kristo sa Banal na Eukaristiya. Siring sa aki, sya dai naghahadit kan maabot, kundi biyong nagtitiwala sa Dyos. Dai sya nagmamalisya sa gibo kan iba, asin matinubod-tubod sa kabùtan kan Dyos.

Ano an magayon na ugali kan aki na yaon sako?

"Mag-ingat kamo na dai nindo hamakon an sarong kaining saradit..."

An mga aki iyo an maribay sa sato. Ngapit, sinda naman an mga maglilingkod sa satong parokya. Kaya mahalaga an satong mga paarog. Pinapatanidan kita na dai makapahiling sainda nin maraot na gibo, arog baga kan pagraway, pakiiwal sa kataraid, pagputik asin dakul pang karàtan.

Ano an itinatao kong paarog asin katukduan sa sakong mga aki?

Ika-24 nin Enero, 2021

Ebanghelyo para sa Ika-apat na Domingo

kan Taon

Marko 1:14-20

¹⁴ Pagkatapos ipadakop si Juan, uminabot si Jesus sa Galilea, ihinaharubay an ebanghelyo nin Dyos ¹⁵ asin nagsasabi: "Nautob na an panahon, harani na an kahadian nin Dyos, magbakli kamo asin magtubod sa ebanghelyo!". ¹⁶ Pag-agi sa may dagat nin Galilea, nahiling nya si Simon asin si Andres, naglalaya sa dagat; ta sinda mga parasira. ¹⁷ Nagsabi sainda si Jesus: "Madya kamo sunod sako!, asin gigibuhon ko kamo na magin parasira nin tawo". ¹⁸ Tulos, baya an hikot, nagsunod sinda saiya. ¹⁹ Pagkapauro-enotan, nahiling si Santiago na aki ni Zebedeo asin si Juan na saiang tugang: yaon sinda sa sakayan, naghahirahay kan mga hikot. ²⁰ Tulos inapod Nya sinda. Baya an ama nindang si Zebedeo sa sakayan kaiba ang mga parapatandan, naghali sinda asin nagsunod Saiya.

Giya sa paghurop-huop asin paghiras

"Nautob na an panahon, harani na an kahadian nin Dyos..."

Iba an panahon (kairo) sa oras (chronos). An barko naglalayag susog sa oras puon sa hinalian pasiring sa padudumanan. Kun sya mahuri sa pag-abot, huri sya susog sa oras. An panahon pwedeng sabuton na kamugtakan kan aldaw arog kan mauran o mainit. Pwede man syang sabuton an pagkakataon arog kan panahon na nin pagtanom o pag-ani. Kun nag-abot na an barko, panahon nang magsakay. Dakulang kamunduan kun ika mawalat sa byahe.

Panahon na kayang magkaigwang BEC sa sakong lugar?

"Madya kamo sunod asin gigibuhon ko kamong magin parasira nin mga tawo."

Kan panahon, an mga estudyante nagpapaaram tanganing magsunod sa paratukdo. Alagad, digdi, si Jesus mismo an nagpili asin nag-alok sa Saiyang mga disipulo. Dai sya nag-aalok para sa sarong *birthday party* o sa sarong *political rally*. An sinasabi Nya, Sya mismo an sunudon, bako ngani an Torah. Kun sain sinda maduman, dai ninda maaaraman sagkod dai sinda magsunod.

Ano an dai ko pa nasasabutan sa sakong pag-ayon sa prayer group?

"Bayà an ama nindang si Zebedeo sa sakayan kaiba kan mga paratandan, naghali

sinda asin nagsunod Saiya."

Siring ki Simon asin Andres, tulos man sanang binayaan ni Santiago asin ni Juan an saindang gibo pati an saindang ama asin mga katabang. Buot sabihon, nahiling kan mga bågong disipulo ni Jesus an urhensya asin halaga kan pangapudan ni Jesus. Dai pwedeng paliman-limanon.

Nahihiling ko daw an urhensya kan surusemanang Bible Study asin Prayer Meeting?

Ika-31 nin Enero, 2021

Ebanghelyo para sa Ikalimang Domingo

kan Taon

Marko 1: 21-28

²¹ Dangan naglaog sinda sa Kapernaum. Tulos, paglaog Nyang sabado sa sinagoga Sya nagtukdo. ²² Natatadman na gayo sinda kan Saiyang pagtutukdo; ta nagtutukdo Sya sainda siring sa igwang awtoridad, bako siring sa mga eskriba. ²³ Tulos, igwa sa saindang sinagoga nin sarong tawong sinaniban nin maating espiritu, na nagkurahaw na an ulay: ²⁴ "Ano ka samo, Jesus Nazareno? Nagdigdi ka sa pagpawara samo? Aram ko kun si'say ka: an Banal na Dyos". ²⁵ Sinagwi sya ni Jesus asin sinabihan: "Alo asin luwas saiya!". ²⁶ Pinakibig-kibig si sinaniban asin, makusog an kurahaw, luminuwas saiya si maating espiritu. ²⁷ Nakubhan an gabos, sagkod na magharapotan: "Ano ini? Bagong katukduan, may awtoridad!, pati an maating espiritu minamandahan Nya, asin nagsusunod Saiya". ²⁸ Naglakop an Saiyang kabantogan tulos, minsan sain sa palibot nin Galilea.

Giya sa paghurop-hurop asin paghiras

"Nagtutukdo Sya sainda siring sa igwang awtoridad, bakong siring sa mga eskriba."

An mga eskriba iyo an eksperto kan Torah. Igwa sindang espesyal na tukawan sa sinagoga. Minatirindog an mga tawo kun sinda minalaog sa templo. Dai sinda makataong ibang interpretasyon kan Banal na Kasuratan lain duman na mga ipinaliwanag na kan mga nagkairinot na eskriba. Sinda inaapod na mga rabbi o mga dakulang tawo. Alagad, iba man si Jesus magpaliwanag. Dai Nya kaipuhan magkonsulta sa ibang mga eksperto. Hali mismo sa Espiritu Santo an mga itinataran nya.

Sain hali an sakong inspirasyon sa paghiras ko sa prayer meeting?

"Alo asin luwas saiya."

Dai si Jesus naggamit nin ano man na rito sa pagsantigwar. Dai Sya nagpaaso o nagpabuno nin manok. Dai Sya naggamit plato na linahidan lana. Mayo Sya kan mga binalikdan na mga pamibi sa Latin. Nagtaram sana Sya asin nagsugo. Dangan nagsunod man an maating espíritu. Digdi ipinapahiling ni Jesus an kahulugan kan kaligtasan. Bako sana an kalag an Saiyang ililigtas kundi an bilog na tawo, kabali an Saiyang hawak.

Kasuarin ako narahay dara kan pamibi?

"Ano ini, bàgong pagtukdo, may awtoridad, pati an maating espíritu minamandahan nya, asin nagsusunod Saiya?"

May kapangyarihan si Jesus sa pagtukdo pati sa pagbulong. Dai sinda nasusuway ki Jesus. An pagtukdo nag-aandam sa tawo sa pag-ako kan saiyang pagbulong. Asin an pagbulong iyo man an nagpapatunay kan Saiyang pagtukdo. Dakul an nagtubod sa Capernaum, alagad an mga pinaniwalaan na mag-ataman kan saindang relihiyon iyo an nasakitan na magtubod ki Jesus, huli ta yaon sa tradisyon kan tawo an saindang lealtad.

Ano an pwede kong gibuhon sa laog kan sakong BEC susog sa kabùtan ni Jesus?

Come Holy Spirit

Ingles na Bersyon

Come Holy Spirit, we need you

Come Holy Spirit, we pray

Come in your strength and your power

Come in your own special way

Come like a spring in the desert

Come to the weary of soul

Lord, let your sweet healing power

Touch me and make me whole

Come Holy Spirit, we need you

Come Holy Spirit, we pray

Come in your strength and your power

Come in your own special way

Bikol na Bersyon

Madya Espiritu Santo, kami pakabanala

Madya sa Simong kabagsikan, madya kami suruga

Haprusa an samong mga lugad, madya kami bulunga

Madya sa mga nagsasakit, madya kami ampuna.

